

鶴峯州志

卷十三卷十四

藝文 雜述

跋

鶴峯州志卷十三

藝文志

州設學甫四十餘年其文詞不少概見宜矣然序述時事歌咏風俗或出宦遊所著作或出邑士人之記撰卽改土以前其碑刊序記與投贈詩文之類亦時時散見於他說蓋不得以無文少之焉文不尙炳烺詩不侈綺麗義苟繫乎邑雖異地之人弗畧也義不繫乎邑雖鄉賢所著亦弗錄也詞章辨而人才亦歸於正屈原生於秭歸宋玉起於宜城惡可以山陬僻陋概之哉志藝文

新建文昌廟記

知州 吉鍾穎

州舊有文昌像附祀武廟後又移於書院嘉慶六年頒行文昌祀典 命州縣皆得立廟並祀其先代於後殿禮與武廟埒前署州劉運浩王維球相繼董率其事廟在州西闔內蓋昔土司奉祀至聖像舊址其地狹復買民基而擴之所費益多鍾穎抵任後紳士丕振再接再厲創始於嘉慶十六年告竣於二十五年匪獨新之又從而廣大之匪獨堅之又從而永固之嗚呼何其善也文昌於天官家言爲戴筐六星上將尙武威也次將正左右也

鶴峯州志

卷十三

藝文

二

貴相理文緒也司祿賞功進士也天垂象聖人則之固已梓潼上直參宿有忠良孝謹之象實掌文昌府事及人間祿籍故天下科名之士皆宜祀之

顧鍾穎

有欲爲州人士告者士君子自束髮受書

知在國爲忠良之臣則必恥貪鄙而尙節義知在家爲孝謹之子則必黜乖戾而進慈和體諸躬爲有本之學見諸文爲有德之言其能如此者雖未見神而禮拜之而神已深契之也其不能如此者雖日向神而禮拜之而神已深惡之也然則神豈關乎祀與不祀哉亦在乎人之賢與不賢而已矣

是役也矢公矢慎庶幾能有始終者八人洪繼周
部生榕劉正性龔經德洪先裁謝境安于自貴陸
光五於例得並書以誌美也亦以勸善也

重修城隍廟記

吉鍾穎

州城隍廟創建於乾隆三年前州毛峻德備極籌畫重修於乾隆五十五年前州楊樹本雷應芳皆以鄉保董任其事所用物料率雜舊木土磚未及三十年而已有岌岌欲崩之勢鍾穎於嘉慶二十二年抵州任每值朔望瞻拜憂棟宇之將墜憫垣墉而欲傾其何以蔽風雨而妥神靈爲之相度其形勢而經畫其財用自捐可也勸捐不可也夫民者神之主也欲事神而先擾民則百弊生焉因首出俸資鳩工庀材而民之不待勸而樂輸者磨至

於是楹桷之撓折者易之蓋瓦級甃之殘缺者新之丹青之漫漶不鮮者朽之并置廟田若干以備常供固已有光於前無壞於後矣自古治民之法備則以人道治人事後世治民之法窮則以神道制人心官以掌陽教神以理陰教人有不畏官而未有不畏神者也然則神廟之修惡可以已哉

鍾

穎

司牧茲土樂其地僻而事簡時與山中父老課晴望雨爲之祈晴而晴祈雨而雨者已無不捷於影響卽其四方之多罪逋逃亦虔禱於神而時亦弋獲俾此州得以安居樂業而屢獲豐年者吾知

非神力不至於此也

鶴峯州志

卷十三

藝文

五

重修州志採訪小引

州署知董惟堉

粵惟九野分星職方氏區物土之產八荒殊氣小
行人上民風之書故稽地掌圖蘭臺既典籍宜備
而徵文考獻邑乘尤輶軒所資鶴峯舊屬土司嗣
成州治版圖初附闢草昧者畧紀源流時序代更
覽風教者大異疇昔弗及今重爲蒐輯必歷久益
就銷沉本州才愧烹鮮學慚製錦緣紳耆圖此遠
舉嘉會適逢念民社任匪他人仔肩莫貸因之欣
允所請并囑亟謀厥成惟是八百里樹密雲深勢
難諏度遍及千餘年碑殘簡斷能勿見聞異詞谿

鶴峯州志

卷十三

藝文

六

峒溯唐宋而遙制雖殊而源不可沒黔黎濡
堯舜之化風既周而事多可書劍犢牛刀習俗誰
爲潛易風琴雅管人文孰與振興標傑特之峯巒
名材非梗楠可罄涉幽深之澗壑佳士當蘭蕙同
芳宣力戎行洵多捐軀報國之英俊束身名教亦
有爲善於鄉之秀良至於孝著南陔貞完白首或
已邀旌揚於綽楔或猶且汨沒於窮檐斯固風
化所關允爲表章難畧若夫居鄰屈宋名人續風
騷餘音地廣林泉開士闢仙佛勝境雪泥鴻爪觸
懷而留華翰者幾人徑塗河梁捐貲以成義舉者

安在值 重熙累洽之盛庥嘉知史不勝登洩五行百產之精瑞異亦理所時有薦紳稱道固足以廣流傳閭巷誦揚非無能備紀述彙輿論而成實錄邑長吏臆見毫無申鄉評以愜羣情都人士偏私必屏喜文物衣冠之迥異前曰庸庶幾乎成章斐然惟風土人情之咸無闕遺所厚望於是邦賢者

宣慰土司田九峯二十一史纂序

岳常 姚淳燾 烏程人

風俗與化移易得善變者數人焉倡之而王道之行可以四達不悖矣今

天子聲教洋溢萬國賓服日照月臨之下凡有血氣者皆得曉以禮義導以名分沐以詩書使之蒸蒸嚮化靡有違心况土司星分楚徼禹貢荊州之域去王畿纔三千里奉正朔守防禁輸忱報績歷有年所而拘墟者謂當別其種類羈縻籠絡使不得與於玉帛冠裳之盛嘻何其小也予剖符常岳職在

鶴峯州志

卷十三

藝文

八

寧邊莅政之初卽聞宣慰田子尊賢禮士飽飫詩書以著述名家私心固已異之既又聞其編輯史畧二十一朝互有商確芟繁摘要考誤析疑殆類通儒之所用心非苟焉而已也戊寅夏四月田子忽遣使載書滿車冒風雨數百里走蘭津投贈索叙其子應恒款門入謁風流淹雅有吳公子遺意予益歎田氏之澤再世未艾而

聖天子文教誕敷涵濡浸灌其收效於天下若是其大且遠也雖然止水鑑形日光體影千秋得失史文大備矣田子披覽之下見古者山陬海澨有奉職

勤王銘勲天室者有夜郎自大抗天拒命冥冥焉
不戢自焚者有世篤忠貞分茅錫土傳之無窮者
有叛服不常初終異轍嘗試天威隕其世墮其緒
者其間是非禍福一一澄觀而靜驗之於以敦修
自好力帥諸司永承帝眷後之人踵其業者學成
而升於有司試於鄉舉於春官彬彬乎後先王國
與一代名臣並光史冊此誠稽古之榮善變者所
宜自效而功先倡導予亦藉手田子報南服之最
績焉日夜望之矣

平山萬全洞碑記

土司 田舜年 九峯

平山容陽一大保障也昔文相國鍊菴寓此有年稱不容口其山四圍峭壁寬廣縱橫可百里東西南北有四關所謂一夫當關萬夫莫往之地南關保安橋飛虹天半又八峯十景之一也創自先曾祖郢陽公今東關古城是其經始遺堞先祖太初公造廳事數楹於橋之東偏至大伯父雙雲公時值闖獻肆訁不信文相國之謀以致張皇遠避及事後始痛定思痛而大修其城卽今東關之新城也雙雲公卽世二伯父夏雲公僅遵成事迨先少

鶴峯州志

卷十三

藝文

十

傅公乃稍修理之自夏雲伯與先少傅兩任間流賊竄擾歲歲用兵皆以天泉爲根本蓋天泉小而平山大天泉數人可守平山非土軍數百莫能布置而不知平山之下有萬全一洞也洞初名何家洞萬全則予修葺後所名也予爲兒時隨夏雲伯往來天泉道中見洞圓廠如畫竊思一遊未果自乙卯承緒後鑒於先少傅公去天泉而移黃鸞鎮致有闔司入於劉營之變於是一意以天泉爲肯構以九峯爲司治而更葺萬全洞焉始入洞時中皆大石填塞平地僅二丈許爲土民屯守之所予

相其勢可開闢也遂於去洞咫尺之新坪始葺署
舍環列四市以定其基舊稱洞中無水僅仰汲山
巖上涓滴然非無水也水皆由石中行也盡起其
石築爲城臺而泉流如注矣予自癸亥春移居新
坪在洞經理日多至丁卯之冬守禦旣固亭閣亦
稍稱完備每當日月照耀雲霞捲舒覺山川草木
蔚然深秀遊其間者莫不嘆爲物外巨觀而豈知
良工心苦籌所以緩急可恃者非一朝一夕之故
耶夫山間之洞不少而萬全有平山爲之表平山
得萬全爲之裏表裏相依而前人經始平山之舉
可以告成矣予故誌其顛末復爲八韻以記之記
萬全卽以記平山也

重建虹洞橋碑記

今名花橋

明庶士黃

燦

澧水東北折別沂溪稍西上天門抵陵陽距百里許爲添平禦治隣禦齒屬則麻陽麻陽者麻寮守禦也唐氏世職於茲攷麻陽古婁中地西接容美東折出石澧達荆岳南邇九谿慈利慈利在昔爲臨澧國朝割臨澧天門之僻隘建設守禦隸屬九谿俾阻要害闢叢篁備征繕遏克攘地多懸崖箐林丹障邃谷岠嶼激轟澗派凜冽雨注泉鳴瀑湍駛迅迴合成溪其兩水環唐氏宅夾抱周旋滙於麓右則虹洞橋是也每當山漲岸裂勢同望洋需

鶴峯州志

卷十三

藝文

十二

藉浮龜續斷航宏治初年戶侯唐公明德就墩架木構亭其上久之頽圯後龍崗公嘉靖年間重輯捲石飛甍磷磷更新舊傳于姑元學者董助甚力歲月浸遠洶濤激石流漸齒唇乙酉徂暑泡雨衝潰裔孫唐侯君秩惻然念之迺出私橐鳩傭工求礪礮斬陰木浹旬告竣亭厦備具橋成仍其故額曰虹洞勿忘祖也時余伏苦塊避寇添平唐君走使告書其事余以時事愴心楮墨久廢辭唐侯復請曰夫再造者艱前經始者勸後某之營此先是得諸祖夢彷彿仙姑內子同符矧梁成卽捧檄出

師矢勒先烈殆有神乎明公何惜一言不以示鼓
舞後之人罔聞知余惟周禮司險知川澤之阻而
達其道路水涵具舉獨木云權橫木云杓石杠云
倚麻陽雖僻然棘除道通合爲九谿侯之事此視
夾彩架天有間比諸權杓則已懸矣又陽羨似虹
謂其橋南北高起有似虹形棘陵垂虹宋紹興中
金人犯境衆議焚橋郡守洪遵持不可縣父老亦
集哭圯下得不果焚虹之命名厥來有自今者北
師南下狡寇星奔所幸長江一帶宛然天塹使得
勝兵良將造舟爲梁斷流可期奚止遏其飛渡耶

夫慈利治西有水沉洞焉發源酉水經流魯陽山
俗呼爲魯陽溪計虹洞浸流相去不遠異源同派
繇臨澧共會湘沅以道於江水之朝宗橋之取義
悉與時事合唐君此逞以其治橋節而愛推諸治
兵律而臧指俟奏膚公膺上賞貽後昆光祖德端
在茲矣詎止修葺一橋之爲功德乎遂走筆書之
以示唐君曰其毋忘此志是役也起於某年月日
落成某月日唐君名加陞字君秩世襲麻寮守禦
所正千戶

江坪普濟渡碑記

州知方天葆

州南路江坪九女河水迅激舊以獨木槽舟爲濟
往來者患之前牧毛公峻德捐俸設渡船一隻並
置買地畝山場以爲渡子養贍修船之費立有普
濟渡石碑碑陰鐫刊地山界址糧稅數目欲以垂
久遠故並載之州乘百姓至今頌之不衰嗣因碑
燬於火而接管渡子私賃前置之地船亦朽壞民
苦病涉復歷有年所今山羊司胡公國梁重修渡
船復召募里民陳乾一爲渡子清查前地爲餼資
禁止勒索並於渡口捐置房屋三間給與居住俾

棲身有常不至行人呼渡需時其所以便民至矣
事葺之後詳請立案備考予曰此州牧事而賢司
先我爲之予能無愧焉雖賢司莅任以來諸廢俱
舉匡我不逮者正多然卽此辦理普濟渡一事其
心與政蓋亦可與前牧毛公相媲美歟爰爲之記

書唐姓誣控毀墓事

知州 吳煥彩

邑大崖關外舊有所官隘官唐姓其一也設流後所隘缺裁唐姓子孫之處石門慈利者倚世職作護符每朋黨入山指荒土爲祖墓誣人剗毀給以錢則不興訟而其實唐姓祖墓關外止三冢皆經標識有不甘受其誣者互相訐訟事涉疑似不能驟決民多因以廢業失時於是關外荒土爲唐姓奇貨歲有獲焉乾隆四十八年石門世襲千把唐彌盛唐盛業唐運太生員唐業精四人者以監生王炯毀其曾祖唐世順叔祖唐之徵墓控於予予

卽其所呈族譜驗之覺其奸詰之曰爾譜內已故者數百人並未載葬某地惟於唐世順唐之徵簽標葬白果坪則此數百人皆可隨時簽葬地矣毀墓之獄安有窮乎四人者饒饒爭辨固請予往勘蓋關外距州治百四十里山峻路險意予必憚跋涉卽往亦必不輕發人冢而彼之奸仍可售也越翼日予召兩造隨出關至則四人者痛哭涕泣詐爲祖墓受毀傷狀予曰王生毀人墓有明法在顧不見墓中棺獄無由具爾等自舉錘刨之以爲驗四人者有難色予怒而迫之刨至六尺許皆實土當

是時環觀之人無慮數百其代王不平者有喜色其助唐詐索者有懼色四人者左右瞻顧頽形於面釋錘叩首曰公信燭某等之奸矣某等力竭願伏辜不能劊矣先是民人劉士元者亦以唐彌盛等誣其毀墓具控予卽於是日往勘仍命自劊則一水坑也四人者益惶恐無詞予取其誣控結狀遣之去邑士民請於予曰關外居人以毀墓受累數十年矣公一日履勘其奸俱露幸何如之然願公更有以警將來也予旣爲之示禁并書其事而勒之石

重修

關帝廟碑記

知州

楊樹本

州城之南有

關帝廟衆山拱峙一溪環流地既崇隆勢亦宏敞洵一
州巨鎮也攷之舊碑蓋創建於土司田太初其孫
田舜年復擴而大之并範銅爲像以奉香火時爲
康熙壬申歷今已百有餘年矣顧是時名弗彰改
土後列於祀典春秋官僚肅衣冠致祭於是典制
攸隆而神威益著於遐邇嘉慶丁巳春予復來
茲土竊見棟宇漸頽門廡盡圯急謀所以新之會
軍務不果八月事竣偕州人士載瞻廟宇方以工

鶴峯州志

卷十三

藝文

十七

鉅弗克任是慮而一時咸起而言曰我儕之得有
今日微神之力量不及此曩者隣匪肆擾已入北
境之金雞口賴官兵追遁而挺而走險屢迫州疆
最後復欲由北境竄入時大軍已移藩籬莫保人
心惶惶幾不知身家爲何有乃卒不敢窺伺從間
道遁去不啻如見八公山隱隱有所懾伏者豈非
神靈默佑俾我儕罔懼兵燹耶不寧惟是州人率山
愚耳顧數年以來無一人入其黨悉皆應募當役
急公趨事又安知非神之聰明正直有以默牖
其衷而邪妄悖逆之輩無從煽惑耶今茲議新廟

宇誠我儕所亟宜酬報者願乞一言爲各鄉勸爰
議城鄉首事庀材鳩工樂輸者踴躍恐後於戊午
八月正殿一新固未有工成如是之速者也由是
山門廊廡以次建立且於殿前構亭爲各官肅拜
之所兩廂翼其旁鐘鼓亭峙其側歌舞臺臨其前
規樞雄壯氣象聿新迥殊舊制眞可扼重一州佑
我黎民於百世者矣落成之日偕同官瞻仰殿庭
徘徊眺覽不惟巍峩炳煥神志肅清而林巒森秀
溪水澄鮮更與畫棟丹楹交相輝映是神之威
靈不且與山之高水之長永昭赫奕乎哉是役也

各勸諭首事及監修諸人靡不各殫心力而不憚
勞苦以身率先則里民喻文奇爲最故未及期而
工竣余旣誌其顛末復列書姓名於後其樂輸工
費無論巨細亦各勒於石俾一覽可得并可知州
雖山陬固不少急公好義之人也

改建劉家司義學記

州判 王惟球

古之教者家有塾黨有庠州有序化民成俗雖鄉曲不可廢也容陽自改土歸流漸沾文教六十年來鄉舉選貢均已有人厥後人文蔚起月異而歲不同烏知不於家塾黨庠驗之余自壬戌之夏莅任北佳坪查所屬劉家司向有義學卽古黨序意也閱兩月公便過其地見其屋已傾圯且在深山古廟之旁孤僻荒涼人跡罕到匪直獨學寡聞且恐燕朋燕辟或惑於外誘而不覺良可惜矣又閱兩月紳士有部聖堂者余同年父也偕田仰韓易

仁則田紹武諸人來商於予愿勸捐改建於北佳坪余欣然諾之捐俸爲倡並以署右餘地讓作基址前爲講堂後爲坐廳兩旁正室界分四爲生童臥舍右偏廂房爲廚竈暨天井門樓墻垣臺砌落成之日無不楚楚可觀有謁余者曰此座山作伏虎狀易曰大人虎變其文炳也且左倚官衙右連文昌閣翠屏環拱清溪抱流與夫竹木之陰翳禽鳥之飛鳴滙爲活潑潑地他日文才之盛不卜可知顧所切念者惟以是舉費雖不多成亦匪易亟爲訪通儒主講席離經辨志敬業樂羣以冀有得

視向之僻處劉家司有名無實亦已愈矣其部發
館金牒詳州郡每歲仍令照領舊舍卽捐彼處廣
福寺作爲廟業至若修脯之宜增膏火之應給又
在有志諸君另爲籌備茲特喜其成用記顛末云

嚴烈女傳

王惟球

北佳坪保墨湯井民人嚴紹文有女名珊年二十
一幼字同里梅氏子士龍梅遷居陝值蓮匪之亂
傳言合家遇害女遂改字宣邑之張堯典已親迎
矣士龍由陝適回女聞信中道而返背父母縊焉
閱日紹文士龍堯典暨各戚黨不赴州控而集訢
於余余曰此聰明貞烈女也一死而三家之事俱
釋矣蓋女之字梅而改字張者傳聞之謬也梅張
互控官必歸過於其父女似可以父命爲辭字梅
歸梅字張歸張人盡夫也聽之而已此鄉曲女流

罔知大義惜性命而不顧廉恥者比比然也若烈
女則審此至熟以爲故夫旣在不得藉口父命猶
踐新盟而行已在途亦復恥尋舊約之張不可之
梅不能且以區區之身速父於訟何以爲人歿則
已矣猶可明無二心以釋憾於梅而慰謝夫張並
得全其父非故敗盟而爽約也其處此萬難之勢
而能曲盡其情其心之苦雖古節孝之嘖嘖人口
者不過是也吾不意窮鄉僻壤風氣衰頹忽有是
女而有是事也士龍堯典亦復何言判令紹文收
葬亟爲述其事勒石表揚之庶幾貞魂慰而風俗

敦不僅士龍三人永息訟端已也

鶴峯州志

卷十三
藝文

二十二

州人洪穀齋封翁八十壽序

州知

吉鍾穎

丙子秋副憲蔣丹林先生聞予補秩鶴峯自京來書云鶴峯雖僻在一隅其間有舊友洪君鳴臯曾任粵東令爲人廉靜誠直足資延訪予卽心焉誌之而知其見重於鉅卿者必有自來然猶未悉其世德之若何也丁丑夏予莅斯土洪君鳴臯偕其弟理堂通刺相見得悉其封君穀齋太翁年高德盛好善樂施爲鄉黨所矜式其太孺人亦克相夫子力操井臼辛勤起家長嗣君以孝廉歷官廣東大縣所至卓卓有政聲次嗣君以明經屢任司鐸

訓迪有方今皆歸里承顏養志諸孫頭角嶄然顧而樂之以引天年翁之膺福受祜其亦厚矣哉竊思夫世之以勤儉裕家業者未嘗不課子讀書蘄有成立然未必其二難競爽先後皆獲祿仕以顯揚其親卽兄弟皆仕矣而未必其親之年登髦耄卽父母皆壽矣而未必其身之康疆今乃於人人冀倖而不敢必得者賢伯仲獨能之可不深幸歟繇是里之人咸嘖嘖稱羨以爲翁之受祿於天實有倍於尋常者然徒慕其嘉偶之齊年子孫之逢吉而不知所以致此之由是猶溯流而忘其源也

豈知翁者哉翁性純篤家居以孝友聞且材識練
達籌畫如燭照數計因是家業日興誼周宗戚惠
浹里鄙顧其性甘儉約衣服飲食淡如也州中有
大工役惟義所在必力自肩任蓋鶴峯自改土後
一切修建事宜前此皆未遑舉行得翁爲之首倡
凡巖宮學齋與祠宇之載在春秋祀典者咸鳩工
庀材次第告厥成焉其餘如福田寺三元橋復不
吝貲財偕衆修整完固以是知天之報施善人固
自有由翁之受 褒封享多福所以倍於尋常者
其在斯乎其在斯乎吾聞之壽者疇也有壽於世

之行天必疇以大年將見保艾爾後洪氏之興何
可量焉夫敬禮高年表彰碩德以維風化以厚人
心固有司之責也茲值太翁與其德配先後八十
壽辰鳴臯昆季請予一言以爲壽爰摭實以道其
梗概如此

謝晴文

吉鍾穎

浹旬秋雨山吏心焦諸陰不閉積澮難消溢隄泛
隴達旦連宵誰告帝所爲止飄蕭祈未轉瞬霽在
崇朝求神神在孰云其遙神司容土幽贊德昭豐
年屢告腹不至枵屠維紀歲雨露尤饒豈於小潦
遂起曉曉況在拙吏敢有妄要心雖顧慮身隔重
霄而蒙神聽立予颺颺黑蜨縮頸跋烏揚翹四山
雲氣劈之使影明星在戶突見斗杓迴異昨雨濕
鏤僧寮授文使誦星必箕招有人來告溪漲山橋
石路泥滑路阻嶮嶮豈惟耕者水沴爲悞言已而

鶴峯州志

卷十三

藝文

二十五

嘆告我同僚山衙夜靜坐聽瀟瀟禱憂難達望斷
秋寥神意忽動元冥不驕豈私於我俾我釋繆我
爲民喜可保蓂穗不慮臥水不愁漂非神之佑
民何以聊欲寫神貺握槩難描同官肅拜言取血
膏坎其擊鼓間以笙簫式佇來格歆此申椒我更
有請福豈一邀神終其惠玉燭常調

募修百斯庵引

洪先燾

州人舉

百斯庵何自仿乎予聞諸父老蓋容美時爲艱於子息者建也其名則取諸百斯男之義云爾夫以文王之德有太姒爲之內助其所以綏福祿而迓天休往往見於歌頌矣而說詩者推其發祥之自以爲周家世篤忠厚積功累仁者十五王鬱焉未食其報而眷顧所加不得不以開闢未有之盛佑啓而光大之蓋千古一人而已報與施適相當有符契焉非可倖而致也後世自學問之士多諉於氣數而不盡其理而流俗又祇以拈香獻媚爲求

鶴峯州志

卷十三

藝文

二十六

福計則宜乎吉祥之無由迓而抱伯道之憂者比比也申包胥曰天定勝人人定亦勝天蘇長公曰仁者必有後皆以言乎報施之理捷於桴鼓而萬世莫之或易也今夫世家右族瓜瓞綿延賢才輩出或十餘世或數十世人莫不羨其門之大也而不知所以致此者必其祖若父爲之培植子若孫爲之世守以相引於不替而美不先盡也雖其視聖賢之所以得天與天之所以報聖賢者有大有小其爲燕翼貽謀則一也人誠能卽是以求焉求自盡其分以無愧於心焉燕蘭之夢長庚之兆何

必古人咏螽斯而誦麟趾皆理之一定而莫之或
爽者豈非然哉豈非然哉此前人名庵之本意也
今庵歲久坍塌同人謀所以新之時燾方於嗣息
厪念因舉古義爲說併請爲諸君子發軔有能發
大歡喜心者雖與誦思齊之什可也

重修城廂各廟紀畧

洪先燾

昔裴度修福先寺皇甫湜爲作碑文一字三絹曾
王學記炳耀千古近年畢秋帆先生撫河南時修
八里橋 關帝廟予宗亮吉太史根據陳壽三國
志叙述忠義凜凜有生氣此皆文章之極至足令
文士擱筆者然予嘗輯大埔志因得博覽各郡邑
之志學不必曾王莫不有學記目未覩陳壽三國
志莫不有 關帝廟記筆不若皇甫湜莫不有祠
觀廟宇之文此豈徒揆藻摘華競勝詞章已哉蓋
亦以紀建置之原委著作者之勤勞崇國家之祀

典綿地方之香裡藉筆墨以昭來許云爾今吾刺
史修纂邑乘命博採各廟碑記虛無以應舊碑間
存一二文不足錄則邇日之金碧輝煌更閱數十
百年有訪求相度之歲月改建之始末亦都無所
考証豈非邑乘中一大缺憾事哉是吾輩操觚者
之羞也燾請撮序其畧容美於今城隍廟旁建學
舍數楹祀 先師像改土後創建 文廟多用田
氏舊材至乾隆五十餘年遂朽腐不可支邑侯蔭
軒楊公勸諭重修署州蘿陽何公繼之邑人踴躍
趨事規式照舊工較堅固又於其前添建獅子亭

及名宦鄉賢祠乃移城隍廟旁 聖像入祀加藻繪焉共約估費以一千八百金計 武廟建自容美改土後屢有補葺至嘉慶初漸圯邑人醵金重修大殿兩廊戲樓并添建拜亭及左右鐘鼓樓費約數百金廟旁爲百斯庵於嘉慶初重修其前爲三義祠後移祀神像於 關帝殿後另建廟移祀細柳城之龍王像併入武廟僧掌管以便香火亦估費金以數百計福田寺容美古刹也祀大銅佛三上數百武爲報恩寺係田氏家廟前臨市後抵校武場邑人以供奉目連大加修葺頗極壯麗

至乾隆五十三年大水二廟漂沒殆盡父老以報恩寺地較低窪遂併歸福田合修亦約費金以一千數百計此重修各廟之大畧也夫爲善無近名亦不可没人之善各廟雖吾父與有微勞設非邑士庶勇於趨公虔於事神烏能於廿年間百堵皆興釐然就理其必有文以表章之宣也乃燾爾時方與部子生榕從事帖括馳驅風塵又以題目重大名作林立未敢率爾握槩而邑侯之操燕許大手筆者適值苗匪教匪先後騷動調兵勦戍軍差旁午更不暇吮墨濡毫爲此不急之務故碑版至

今闕如也茲撮叙梗概依事直述詞不尙華聊補
缺畧庶較沒字碑爲差勝也後人可以無譏又邑
舊有文昌像附祀百斯庵後移祀書院嘉慶六
年奉文建廟祀典如武廟邑人士呈請捐修至
十五年諏吉上樑規模崇閎踰歲竣工燾解組歸
里或以碑記見屬予以荒疎辭竊聞文昌六星在
斗魁前蓋星名也梓潼帝君之號唐時始見雜
記世所傳文帝化書載七十二代士大夫身姓氏
確鑿拘儒不敢道然在天爲星辰在人爲聖賢在
幽冥中爲神靈貫通一理杳渺非誣功令旣頒

理益顯著邑人士旣知奉公修廟虔心裡祀必能
仰體帝訓父兄相教詔師友相磨厲俾秀異子
弟爭自濯磨湛深經術砥行立名與陰隲相印合
吾知帝君司命司祿權衡桂籍亦必潛相默佑
煥我山陬發科發甲後先接踵不似前日之朴魯
無文也姑附誌於此以爲券

按前牧楊有重修關廟碑記稿本付某未勒
石作者亦未見故文內云云茲將楊文採錄
仍錄此文俾後人得識建修各廟梗概

邑少府陳楫川六十壽序

洪先燾

吏能備清慎勤三者循吏也其能得之下佐末吏乎而我邑少府楫川公實兼備之公以庚寅來鶴於今二十八年矣五斗俸外非分所應得者不乾沒民間一錢食蔬茹筍厨傅蕭然廐無馬囊無金不畜僮僕家有負郭之田不百畝可不謂清乎民以私訟質焉據理以平其曲直而冤抑不一聞也剖情以發其愧恥而笞箠不輕加也上以公事委焉職所當爲者詢諸衆庶而務爲力贊也義所不得爲者復以婉詞而不求希合也可不謂慎乎昔

崔斯立爲藍田丞無所施用孟郊尉溧陽以吟哦廢事名士無實世以爲譏公職在司獄巡視之惟嚴職在弭盜鉤鉅之惟謹簡書可畏不辭鞅掌案牘可省不滯期會曰吾以盡吾心耳可不謂勤乎然則公信循吏也哉使有爲之薦揚於上者焉一歲九遷其官可也胡爲看驗者四考績者九尙屈蠖茲土也或曰圭璧其心者拙於求進廉隅其躬者短於趨時或曰位卑而地僻無殊尤之績可稱無萑苻之功可藉資格所限大憲亦無由以不次待之然公嘗爲燾言吾初筮仕時功名事業雅不

欲居人後今老矣回憶當日同事諸人有超擢飛騰者有獲譴落職者我雖不得顯處亦未履畏途不可謂非厚幸焉且我吏是邑也久其於人民風俗也習往往與邑老者課晴問雨不啻故園父老也與邑少者言孝言弟不啻故園子弟也與邑文士把酒論文不啻故園朋友故舊也一旦遷擢之他能免思用趙人之嘆乎蓋其胸中浩然以義命自安如此而於鶴人鍾情之深又如此歲十月八日爲公六秩弧辰邑士庶謀躋堂介觴而屬燾以嘏詞燾食公德者三世喜邑人之有同心也因以

芻蕘之言代士庶祝曰洪範之五福首壽公年屆指使髮尙未宣期頤可以徵已惟是吾儕小人之愛戴君子者不惟於其身猶望其多賢子孫公諸郎濟濟適符燕山竇氏之數長者能文章少者學伊喔瑤環瑜珥蘭茁其芽天其以此酬公與以公居官能於其職其子孫之象賢可知也則請歌小宛焉曰教誨爾子式穀似之以公積德未食其報其必發祥於子孫又可知也則又請歌南山焉曰樂只君子保艾爾後諸郎皆生長於斯異日聯翩蔚起翱翔雲達邑人士炫耀而侈談之曰我公之

盛德不虛也豈不美歟抑燾猶有私祝焉公不鄙
夷吾民大概如前所稱矣俟再周一甲癸公解組
歸田乎燾當縷述治績告於邑侯祀公於名宦他
日續修邑乘得備載之以永其澤焉

三里荒修路引

洪先燾

三里荒大路離州三十餘里高峻爲諸峯最北出者由痴虎坪而上南來者由東鄉坪而上梯級百仞始躋其巔循巔而下山麓亦約百仞人汗喘馬虺隤矣山腰舊有樵徑險狹不可行乾隆五十年間附近田文龍等鳩工剔鑿成新路坦迤而近省攀崖除磴之勞一嶺橫過上視向所經歷之天梯雲棧乃在空際行人以爲便顧路半皆石砌狹處祇二尺許左倚峭崖斧鑿難施右臨溪澗剗絕萬仞其上下有土處砂石夾雜間爲畚田耕種土旣

鬆動石易傾頽路顧屢修屢圯燾每過此下輿馬偃僂行目眩心悸不敢旁睨并聞土人言時有負重顛隕下澗立斃者心爲加嘆焉因思鞭山填海人則無術若但棄此磽确片壤勿耕種以搖土脉又環路廣栽樹木以作杆蔽而固根柢此固吾輩力所能爲謀諸同志皆曰善願各解囊助買地資地主覃志全等欣茲義舉憑衆估價若干金歸地於公燾喜此路之險可平狹可拓屢修屢圯之功可永固也爰志其顛末如此俟立券後覓工栽樹白諸當路禁止耕種採樵者勒文貞珉以垂永久

黑龍洞修路引

喻章珩
廩州人

環鶴皆崇山峻嶺徑險阻少坦行處州南黑龍洞一帶尤爲崎嶇輿馬罕通而路當阨要前通西三保關外之咽喉也後抵八峯山州城之襟帶也肩者背者行旅之往來者不能舍是而他途之從焉沿溪數里皆羊腸鳥道一綫屈曲有罩崖一段尤逼仄人倚石壁行旁臨深淵心恒惴惴此五丁所未嘗開巨靈所不能擘也人視茲路爲畏途也久矣年來路益圯茲有附近耆民謀鳩工修理礧确者剗削之傾欹者培補之窳仄者砌石而展拓之顧以工鉅費繁商及下走珩曰道葑不可行規國者以爲譏修橋補路亦陰隲文中要條也諸君以濟物利人爲心人之欲善誰不如我必有解囊以相助者易曰履道坦坦書曰王道蕩蕩行爲此險徑歌砥矢矣爰書顛末以爲發大歡喜心者勸

請重修州志公呈

部生榕

拔州貢人

竊惟風土攸分圖書資輶軒之采世年遞嬗邑乘
備文獻之徵故必博覽旁參載筆不遺夫既往因
之居今證古成冊永著於將來鶴峯舊屬土司嗣
成山邑歷唐宋元明之久隸要荒者千餘年值
文武成康之隆設官吏者八十載服疇食德幸
沐熙朝深仁一道同風允稱盛世樂土矣伏
思宣猷布化司牧歷著循良釋耒橫經學校咸推
翹秀疆場敵愾頗多効忠之武夫閨閣完貞不乏
型俗之列女攬著作於秭苑固可問俗考風表善

鶴峯州志

卷十三

藝文

三十六

良於茅檐亦足振衰式靡雖山川城郭舊志已梗
概之粗存而文物聲名今時覺規撫之小異倘其
閱人閱世竟爾紀纂無聞從此傳信傳疑彌將荒
蕪莫考恭惟老父師絲牽僻壤澤遍巖封守正無
私江都相之家風未沫持平不撓雒陽令之政績
猶存敷化理於鳴絃允矣民懷吏畏發幽潛於搨
管定堪激濁揚清某等世處山陬身蒙樾蔭享桑
麻之樂利敷歷幸逢龔黃憶父老所流傳文章思
託班馬伏乞簿書餘暇俯賜丹墨沾濡改土以來
之民俗土宜盈數寸之牘以不朽歸流而後之善

教卓行附如椽之筆而彌彰不惟宇下士民快同
慶雲爭睹亦且山中瓦石咸藉珠玉生暉矣

重修奇峯關橋梁記

部生榕

奇峯關祀 關帝神像於土司舊建成樓樓砌以石瀕於溪溪濶幾三丈當衝路架木橋以通行旅年來溪水泛漲岸日潰樓勢艱脆里人稍徙橋上流廟祝葛叟虞廟之遂以頹也鳩里人議遷他阜予曰遷廟避水策誠善然由此岸益潰樓莫保橋難架樓不保則古蹟湮橋不架則行人病得其一失其二矣且遷廟他阜剗山鑿石費不貲若用其費以修堤架橋廟既不患傾圮古蹟長存行人利賴是一舉而三善備也於諸君意若何僉曰然

爰議量力捐金分途募輸而推予董其事予鳩工庀材堤成橋架并建屋以覆橋上蓋閱歲而事乃葺焉夫溪之有橋久矣溪岸之被衝突亦非一日矣今之修堤架橋緣葛叟議遷廟而牽連相及也設使葛叟不倡此議則堤終不修而橋終不架且使予不身肩其事葛叟雖倡此議仍無異築室道謀也豈鄉鄰貧乏者多憚於重役之興歟抑因循苟安急於義舉者之難其人與吾聞一介之士存心利物於世必有所濟自茲以往堤雖築不能禁溪潦之不衝突也橋雖架不能保風雨之不剝落

也里之人若以爲事不係乎一身一家坐視其漸就坍塌而不爲之所欲求古蹟長存而行人利賴也不可得矣予故記其顛末而復以隨時補葺望於後之踴躍急公者

蓮花石賦

以砥柱中流形
似蓮花爲韻

部生榕

兩岸青山一泓碧水瀏其清矣何緣浪沸成花激
而行之幾見川平如砥罨春草於河畔彌望葱蘢
湧霜楓於灘頭亂浮紅紫誰爲之拒傍崖盡洪水
湯湯是不可磯盈瀨皆白石齒齒爾其郭繞西流
峽橫南浦雙溪逼合飈若雲捲電馳峭壁對懸束
成龍躍蛟舞方瀾渤以飛騰倏漩濃而瀆怒堆非
如馬漫擬江到瞿塘勢忽迴瀾恰同河流砥柱則
見石紋劃蘼花影漾紅轉移無時殊泗濱之浮磬
雕飾盡去異莖露之凌風乍疑下有驪珠竟日精

光四射不道中無泥玉長年深色一叢偶臨流以
攄懷如遊池上倘涉波而言采宛在水中於焉魚
戲東西南北蕊歷冬夏春秋驚艷匪遙擷來思同
澧浦裊芬殊杳望去空憶芬洲或者天補媧皇遺
片石而鏡光難掩不然機支織女付清流而錦段
猶浮漫云郎面同妍丰姿近若壁立可是女身倏
化幻相逾添風流爰乃放情巖壑躡屐郊垵陟岡
巒兮徘徊彷彿佛座湧現瞻極浦兮緜眇依稀仙
舟艤停證山海經之名葩光驚四照分西王母之
異種開閱千齡倘遇好奇坡公中宵定亦理棹如

逢善畫王宰五日可能繪形彼夫鑿池精舍規入
社於遠公作說濂溪比不淄於君子旣清殊錦城
芙蓉亦韻勝河陽桃李然而英標曲沼迎初日以
嫣然迨至芳萎淤泥彌寒潭其何似則雖足遠超
凡葩孰若茲常對彼美至若磳鍾雲夢珉產藍田
靈壁新奇寶玩米顛之袖鬱林磊砢裝載廉守之
船美縱比天上三品秀終輸波中一卷曾說客遊
湖心花堪作壁爭知頭點水面舌亦生蓮觀夫響
激涇硤猶是硨磲之石根磐厝窟居然燦爛之花
清露濯姿蕩搖曾無綠蓋碧波漾采掩映不借朱
霞若箇塞芳製裳應思清徹肌骨何人枕流漱石
可有香盈齒牙漁父問津當年羨桃花夾岸畸人
探勝此地學斗牛泛楂

鶴峯八景

八峯聳翠 紫草輝霞 龍溪夜月

印石承基 果老仙洞 蓮石砥柱

龍潭古鼎 天泉保障

以上八景爲土司所標列故舊志有容美八景之語溯其舊也嗣後咏八景者皆改題容美爲鶴峯焉

州署八景

鶴亭遠眺 射圃歸鴉 古梅殘雪

荷亭避暑 竹院聽風 雙桂排衙

鶴峯州志

卷十三 藝文

四十二

雙柏插雲 西山夕照

以上八景前牧方天葆標列

黃象洞在瓦屋臺洞水浸滴成崖筍其形如象齒

鼻皆具色黃故以名洞

三潮水懸崖壁立有泉按寅午戌三時飛流瀑布

過期止一綫涓滴故名

日月崖在黑門兩旁石壁上懸二圓岩一赤色一

白色故名

夜珠池在玉溪峯頂有寺寺前有池名夜珠

包穀

知州毛峻德

山田多犂确惟黍實生之吳下呼雞豆秋深老玉
蕤白抄雲子碎青怕沐猴窺粗糲思艱苦窮檐足
療飢

咂酒

板屋團圞坐歡呼挈一瓶白波捲細管紅友吸仙
醺戶小鄆笛醉魂招楚澤醒底須杯在手麩部未
圖形

鶴峯州九日 用杜韻 知州李林

高倚山樓腰帶寬客中佳節強爲歡三杯白酒辜

鶴峯州志

卷十三 藝文

四十三

新蠲一徑黃花笑破冠候雁影分重嶺斷丹楓錦
碎隔溪寒租符底似催詩急爲寫煙雲作畫看

鶴峯懷古

署知蔡本棣

才子工愁懷宋玉 在巴東美人遠嫁惜明妃 在歸州騷

壇月冷荒青塚獨對空山雲影飛

夜郎相近灤西東流落天涯尊酒同一自共開詩
世界至今巒嶂盡凌空

先主荒祠配武侯空山俎豆獨千秋幽魂長抱三
分恨風雨靈旗戰古楸

白雲深處接巫山暮雨江城客夢還多事仙才工

作賦高唐神女有無間

荅宣慰土司田九峯兼送令嗣應恒歸里

岳常道 姚淳燾

蘭津峽路未全遙鎖鑰同心荅

聖朝三代風流歸洞口懷春詩草碎芭蕉

其二

幾年史畧費刪除投贈牙籤載滿車
二十一朝披覽盡可知荒徼故同書

其三

鵷雛春暖向蘭皋還往翩翩試羽毛
黎甕欲傾千

鶴峯州志

卷十三

藝文

四十四

石綠爲清邊氣荅賢勞

其四

漢家明月共迢遙有意重過莫待招
料得南州歸夢曉錦雞啼處憶吹簫

鶴峯八景

署知州 吳世賢

八峯聳翠

猛虎恃負嵎化蜀傳飛檄羅列刀劍形
時平同面壁八峯峯無名蒼翠空欲滴

紫草輝霞

返照石壁紫綺散繞餘霞此中茁似草
四時不斷

花莫問商山叟或者葛洪家

龍溪夜月

我出城南門亂山凹更凸下有一線溪
潨洄貯明月相戒勿輕探俯恐驚龍窟

印石承基

臣心清於水臣節介如石放衙閒鎖印
蒼苔繡一碧寵辱兩不驚一片留青白

果老仙洞

白雲與之俱仙靈洞中宿粒粒濟衆生
何用監門哭爲問辟穀方倒騎驢尾禿

鶴峯州志

卷十三

藝文

四十五

龍潭古鼎

古鼎垂雙耳下有毒龍藏酌泉泉不竭
搗藥水雲將豈必享大烹霖雨溥羣蒼

蓮石抵柱

靡靡厭卑喧蓮花凌空結一柱抵中流
衆魚潛其穴亭亭開十丈舌在還能說

天泉保障

雞公連石寶去天儼尺咫泉聲石上流
楚氛淨足喜在德不在險保障固如此

運米行

吳世賢

萬山積雪雙足洗一步一跌運兵米兵鼓腹兮民
忍涕有時破涕詞轉笑聲聲高唱邊關調邊關烽
淨月如銀年年歲歲蠲租

詔況復將軍羊峴山旌旗細柳鎮南蠻軍中粒粒念
辛苦力役何辭行路艱君不見昭君村接鶴峯樹
萬里蒙塵輕故土

包穀行

吳世賢

萬峯簇簇人似烟鳴鉦擊鼓詞徹天小婦赤脚男
尻肩相呼相喚來種田田中青青惟包穀粒粒圓
勻珠十斛十斛量來賣街頭青錢只堪腰一束今

鶴峯州志

卷十三

藝文

四十六

年處處樂年豐換得錢歸室磬空空室空還仗明年
種那顧飛躑兩脚腫衣不沒骭骨如柴包飯搏成
走斷崖年年雪棧冰坑裏帖耳低首莫抗差差來
側目冷一笑喝取包穀作馬料

州署八景

州知
方天葆

鶴亭遠眺

八百延袤萬疊山斗州天塹四雄關桑麻雞犬風
猶古文物衣冠俗不蠻洞裏笙歌聲寂寂溪邊鱗
石水潺潺可憐改土歸流後荒塚空餘夕照間

射圃歸鴉

觀德亭前噪暮鴉羣舒金翅碧天涯無心出岫雲
多態有意還巢夢正賒帆帶夕陽歸極浦雁驚歲
晚落平沙分明識得棲藏處射圃何妨任爾家

古梅殘雪

長將瘦骨倚墻邊閒守名園半是仙魂斷雪餘拋
玉珮夢驚風過落珠鈿林昏有霧籠綃帳月淨無
塵染素娟此地寂寥君莫怨耐寒誰復占春先

荷亭避暑

水繞荷亭花滿池小橋南畔暑氛稀涼生翠蓋搖
紈扇風弄銀波沁葛衣長日正愁午夢短幽窻却

鶴峯州志

卷十三

藝文

四十七

喜晚香微爲憐此地真清寂斜倚朱欄待月輝

竹院聽風

庭院浮筠似渭川烟梢裊裊晚風前漫將屈態迎
人笑好瀉寒聲却自憐簾外恍聞飛玉粟月中疑
聽步嬋娟客來野飯休燒笋留得竿長譜管絃

官衙排桂

堂前列種木樨花爲愛天香不放衙霜薄瓊枝清
徹骨雨肥金粟碧於霞端排雁序分班第好整鶴
行作爪牙正是衆芳搖落盡貪看獨秀占秋華

雙柏插雲

古柏蒼茫望轉迷
生來兩美一般齊
參天黛色雲爲髻
溜雨霜皮月可梯
斗柄正垂高幹北
山形低向嫩條西
不愁歲晚驚寒雨
長有祥鸞待汝棲

西山夕照

爽氣徐來日已斜
西山憑眺極天涯
碧峯疊作重重錦
斷岸流成片片霞
怨女罷粧還繡閣
征人攬轡趨晴沙
徘徊不盡登臨興
回首名園待月華

細柳城觀刈稻與農民問荅作

州知 雷應方

隴畝高低黃雲平
南阡北陌耒耨聲
長吏奄觀有

鶴峯州志

卷十三

藝文

四十八

喜色老眈不覺嗟
嘆生問言秋成非
不好八口仍無半
歲飽今年淫雨緜
仲夏富室扃倉長
穀價手中無錢腹
中飢不是倍償不
能借可憐青青田
中穀未熟已入飢
人腹此日禾場索
逋去婦子歸來吞
聲哭貧家有年還
如荒出門何處逢
酒漿安得富室無
債券有穀不上他
人倉

登署後鶴亭

州知 吳煥彩

四面擁烟鬢人行
步步艱峽吞兩河
水草占半城山竹
樹圍村小魚蝦入
市慳荒陬樂訟簡
好共白雲閒

望鄉臺

盤折到絕頂危亭片刻涼雲邊山萬點巖際樹千
行綿邈通巴蜀巍峩逼紫蒼海濱何處是東望憶
吾鄉

容陽詞七首

州知楊樹本

陟岡種包穀履險乃如夷豈不畏蹉跌相期免調
飢

深山多棄材採伐任枯槁山中木綿不易得櫓
滿爐代布襖

大米珍如珠高粱亦罕有祭祀及燕飲一味包穀

鶴峯州志

卷十三 藝文

四十九

酒

高荒多苦寒五月蔬未熟何以給饗殮猪草和稀
粥

背版山嵯峨任重取值多只願有力大如虎不辭
身作牛馬馱吁嗟何人不努力山民力食勞如何
黃豆漿包米飯秋稼初登適所願山農一飽勝珍
羞日食萬錢猶貪怨
生長深山中不見山外事蚩蚩者何爲怒焉慙撫
字

留別鶴峯諸紳士

州署知何學青

瀟瀟風雨兩忘年彈指瓜期忽惘然自分少香留
去座他時高會憶羣仙雲依碧落三珠樹雁拂清
霜九月天醉我醇醪無限意問君何以贈韋絃
咂酒二首
何學青
屏除杯琖對陶罌主客遞將雙管擎吸去香先迎
沫上注來水屢挹壺傾不須漉滓煩元亮倘勸鋪
糟誤屈平最是少陵知此味無多酌我醉難成
釀成貯到經年美試飲尤於夏日宜莫惜我須低
首就可知人慮入喉遲暢懷頗勝傳荷柄勸醉爭
禁唱竹枝蘆酒鈎藤名號舊漫因苗俗錯題詩

鶴峯州志

卷十三

藝文

五十

容陽雜詠

州署知王惟球

九峯南聳正當衙七里西流繞落花此是舊司中
府地每逢遺老說田家

紫霧天高敞四關地雄原許壓羣蠻世傳十八時
方泰蠢爾無端欲作奸

盟心枉欲渙羣疑江左何曾有應師愧煞苗人麻
老丑尙知順逆靜邊陲

煉藥燒丹總自誣道人妖術豈良圖關城未築民
先散不用王師勢已孤

恃險何曾得萬全平山深洞枉相傳至今鐵鎖空

橋影惟見蒼藤起暮烟

何處南藩近日樓却將寶善舊名留署衙左畔鬢

宮右今日倉儲似昔謀

勝遊此日更如何高嶂危崖處處多可惜雲來莊

已毀野田惟得聽薶歌

祖墓松杉浸碧暉崇碑曾策武功巍我今重憩雙

鳧烏華表依然鶴未歸

司鐸三載得風病告歸留別同學諸子

導訓 陳文燿

桃李欣初植琴書忍驟還隻身千里客老病萬重

鶴峯州志

卷十三

藝文

五十一

山編訂空留恨

曾與蔭軒刺史商修邑乘故云

文詞孰待刪祇餘

歸里後遊夢繞岩關

官軍屯鄔陽關堵禦教匪紀事

吏目 陳泰

畢竟鄔陽險隘全么麼底事竄嚴關書符分帛無

明效滴水開鎗有秘傳吉甫戎車來六月韋臯練

卒出西川官家軍帑流星連計日饒歌唱凱旋

包穀吟

導訓 蕭琴

包穀亦黍屬種植滿陵阜山農無他糧惟藉此餬

口幹高五尺餘葉與蔗蘆偶節間孕瓊津狀若笋

初剖緣籜裹爲衣紫絲纏若帚展或如鳳冠擎或
如佛手結實臨深秋年年欣大有吾聞玉山禾樹
大徒遮畝重思米似榴此物卽是否攜筐紛採摘
歌響苔林藪落日啣遙山黃雲覆查簍么姑好肩
背奔趨忘路陡健兒莫逞強腰弓已却走歸家各
磨礱一石米八斗精以供餅糜粗以釀咂酒旣可
娛嘉賓復可介眉壽貧民得有此厥利亦良厚慎
勿多費靡餘三猶待九吾願山中常飽此梁糗

印山石

目吏 陳錫鎮

一印從天降山頭屹屹盤孤城資重鎮巨石得奇

鶴峯州志

卷十三

藝文

五二

觀土戴文誰覩雲籠角不刊斗州同景仰珍重凜
躬桓

鶴峯二首

判州 林廷翰

昨日神仙降玉京翩翩化鶴到容城八峯山聳昂
藏骨兩口河傳嘹唳聲赤壁飛來原是夢白雲乘
去尙留名層巒擬向丹青舞莫訝三年竟不鳴
羣山盤繞出城西幻作蹁躑羽翅齊白綴三分殘
雪淺丹流一點夕陽低偕鳴漫道坡無鹿獨立那
知洞有雞只恐夜深湛露至驚飛欲與鳳凰棲

北佳坪

林廷翰

容陽風景溯當年何事佳名北也傳未許西方徒
擅美肯教南國並爭妍千林夕翠山銜日萬壑晴
光雨過天爲問春秋多勝賞錦囊添得幾詩篇

望鄉臺

林廷翰

仄徑危崖路幾環望鄉臺上望鄉關舉頭明月三
千里極目歸雲八字山異地風光悲楚客故園花
信訪梅灣隔年未得音書至時見天邊雁陣還

廡前白果樹一株不知植於何時然建廡處
舊名白果坪則由來久矣乾隆中前巡司
胡君砌石護持樹日益盛而砌漸墜予

鶴峯州志

卷十三

藝文

五三

重爲修治旣成賦此

巡檢 余遠思 平江人

道左紛披穩結根孤標那礙植當門不同岸柳攀
還折切近庭槐曉逮昏培塿我非惜花果 花開
難見而

此樹亦實 摩挲客亦歷公孫 樹一名公孫謂公
種至孫始得食 低徊

鴨脚勝鳧舄濃蔭幾人堪並論

萬全洞

浙江 吳裕中 南安人

疊巘峻嶒一洞開懸空四阻絕塵埃窟成未必非
全策巢破終然付劫灰危磴久無樵牧至荒天曾
載管絃來藤花爛漫荆榛古連臂清猿日往回

鶴峯竹枝詞

吳裕中

禾黍高低亂石間
高低收成不一般
高處要晴低
要雨天到山中
做天難

栽秧薅草鳴鼓鑼
男男女女滿田坡
背上兒放陰
涼地男叫歌來
女接歌

過大岩關

舉人鄭謙安鄉人

全楚分南北雄關
亘古今徑斜人百
折岩峭樹千
尋傳檄通荒道
飛鴉慕好音
當年防戍地
弦誦滿
平林

鶴峯道上

王震松江人

秋風吹上嶺雲
巔路入椒園
可著仙一綫
天開山

鶴峯州志

卷十三 藝文

五四

罇裏千株楓冷日
斜邊高風霜早
飄黃葉巉石雨
餘傾碧泉最愛
靈花香滿路
馬頭過處幾留
連
雨霽空山暮色
蒼忽然山豁見
平岡零星烟火
連
村社如水官衙
對野塘把酒孤
吟懷自遣擁衾
入
夢夜偏長明朝
又踏雲邊路
細檢行裝待曙
光

紫雲宮

李靜安廬州生人

紫雲繚繞是仙宮
滿目烟霞四望
通矗立丹楹界
天上橫鋪鍊鍊
山中北臨諸洞
禪心寂南挹羣
峯道法崇早晚
鐘聲林外徹
可能說法似生
公

小溪霧行

李靜安

款段徐行溪復溪望中何處辨東西似嫌寫景詩
人過牢鎖雲山不許題

容陽八景

八峯聳翠

謝士璠

庠州生人

聚五連三聳碧空排成奇嶺亦奇峯斗然拔地屏
開隋儼若朝天笏執恭但覺眼前青八面更忘雲
外翠千重晴嵐霽色都堪玩暇日城頭一盪曾

紫草輝霞

丁遠模

庠州生人

城東好是夕輝斜爛漫疑開四照花幾日燒痕青
作黛終年草色紫於霞氣瞻寒谷仙應近芝滿商

鶴峯州志

卷十三

藝文

五五

山我欲家長似楓林秋老後征人指點路三叉

龍潭古鼎

徐本立

庠州生人

陂澤天成數畝涵曾傳古鼎此中嵌水心誰遣神
工鑄碕岸難同象罔探蝌蚪無因摹大篆風雷會
待起澄潭龍蟠犀伏徒能說數典何人證籍談

印石承基

張賜彥

州人貢歲

石方如印不煩剖城郭因依駐蓋麾天上頒來承
重鎮山頭磐處壯邊陲烟雲環繞緘封古苔蘚縱
橫篆刻奇應是恒星化非偶斗州長藉作丕基

龍溪夜月

徐承爵

州生人

繞郭潺潺水向西蜿蜒折赴是龍溪每當良夜金
波漾常恐中天月影低可有漁人吟在罾若逢鮫
客欲探驪清暉似勝千潭印遊侶歸遲聽唱雞

果老仙洞

徐承義

州人

境異桃源別有天豁開一洞近城邊騎驢無復遐
蹤至貸米猶從俚耳傳藥竈丹鑪成往蹟異花靈
草自長年能來此處求仙否不作飛仙亦地仙

蓮石砥柱

丁遠謨

州人

芙蕖一朵四時妍峽口中流望眇緜出水何須香
馥馥臨風只欠葉田田狂瀾砥柱莖寧弱頑質凌

鶴峯州志

卷十三

藝文

五十六

波品亦仙卽石卽花空色相奇觀漫詡火生蓮

天泉保障

龔祖曜

州人

蠻觸紛爭策萬全所憑地險在天泉雄關以外狡
焉啓峻嶺無多危則跽自昔烏烏驚鼓角祗今禾
黍長風烟樵歌牧唱

熙時樂保障還資守土賢

讀楊蔭軒刺史容陽詞呈詩八首

錄三

洪先燾

山陬風景入吟哦事事都堪喚奈何一片獅毛彌
磳确幾行龍爪列坡陀蕨根蒿葉饗殮慣女背男

肩瘡痕多辛苦萬千民氣靜使君爲政本寬和
妖氛蜂起遍荆襄守禦頻年費糗糧賽社更無三
宿酒犁雲偶有數家莊勤披案牘防多訟減派夫
徭抵救荒老杜胸懷次山句艱難曲繪出琴堂
落花廳事滿青莎筆墨工夫得不磨野老新傳栽
譜譜土人初換插秧歌萬千山匿奸頑少十六條
添講解多更把新詞抄萬本後來良牧奉金科
鄔陽關軍中聞賊營歌聲 洪先燾
尙有投誠路冥頑奈爾何釜遊能幾日猶自起高
歌

鶴峯州志

卷十三

藝文

五十七

容陽竹枝詞

洪先緒

州人廩貢

春山桃李爛如霞女伴相招笑語譁今日晴和天
氣好陽坡去摘雨前茶

薈歌六月滿山岡鑼鼓聲中抑復揚莫道山中無
禮數男男女女各分行

磳确坡陀歲易荒山氓半賴蕨爲糧冬來但得晴
無雪也似耕人一例忙

薪盡荒山挖洞煤蒙頭垢面入城來不辭早晚顏
肩苦猶有負鹽人未回

繞城一帶水流西廛市人多傍柳堤何處搗衣碓

石響沿河直聽到龍溪
隔宵相約赴城闌揀出蒙頭格子巾明日笙歌迎
綵仗聽郎說是隔年春

郡城逢新授北佳坪別駕蕭梅菴問鶴峯景

象詩以荅之

部生崧

州人
歲貢

宦遊來鶴峯人言如謫戍鶴峯萬山裏別駕當北
路憶我總角時茲路未停履官廨雖幽僻尙有米
鹽鋪轉瞬三十載惟餘別駕署變遷匪自今請爲
君言故此邦初隸版編氓多流寓燒畚墾磻确包
穀徧菽樹壤藉腐化滋民慶豐年屢坡陀經雨洗

鶴峯州志

卷十三

藝文

五十八

歲久山骨露地廣盡不毛屣棄無回顧舊時井竈
場今日荆榛布戶口十二三蕨薇供朝暮州堂可
羅雀別駕若懸瓠夜停銜山月曉看罨溪霧廨旁
有崇岡是我先祖墓寒食澆麥飯我來歲一度軒
階如許立芒鞋當少駐古人林泉興多爲圭組誤
君去撫鳴琴定得靜中趣莫厭入山深此是吏隱
處

蘭莖臺

喻章琳

州人
廩生

枝條畧似蕨初生時莖如蘭有白絮戴其
頂味脆美用東坡元脩菜韻賦之

青青山中蕨春日敷蒙茸拳芽佐匕筯頗較園蔬
豐卓彼蘭莖臺並起莽蒼中出土戴白絮繭甕裏
絲蟲紫莖排戢戢綠野抽忽忽摘趁菴方嫩簋殮
咏有饜甘脆敵菽筍辛烈異韭葱味美人共嗜捋
掇數日空宿根自蘊藉潛滋蔓草叢來歲區萌時
烟雨散冲融無勞施灌溉擢秀仍從同我家深山
裏甘此自兒童頻年旅食久尊思每繫胸今來薄
世味息壤十蟻封且勿剪早韭且勿蓄晚菘先時
具筠籃薄菜出蒿蓬此腹殊不負竊擬傲萬鍾不
似元脩菜夢想勞坡翁

鶴峯州志

卷十三

藝文

五十九

禾蟲嘆

壬申歲

何夢芝

州人
歲貢

食葉蟲爲膳食節蟲爲賊一蟲二者兼肆毒更無
敵初以葉作巢葉盡根是宅日出下藏身日入上
薦食迅若蠶齧桑多勝馬齧櫪能令信宿間委地
稻狼藉粒粒田中珠農人和淚滴古來捕蟲法唯
有焚埋力蠢茲蝻蝻醜奮飛少兩翼勢成附骨蛆
醫治竟無策我聞蟲之生匪天不駿德騰由吏乞
貸賊由更貪墨感召不一端總歸吏失職方今刺
史堂劉寵共潔白耕也餒在中厥故頗難測莫漫
論襍祥使人興讒慝

蟲災後久雨

何夢芝

與蟲爭稻蟲可掬半墮田中半歸屋青黃錯雜易
霉腐禾場亟平轉碌碡豈意舊雨招新雨崇墉比
櫛不得暴眼看又去一半穀前日禾苗需雨潤晝
夜呼龍龍潛伏此日穀粒愁雨斲龍公故故來不
速龍兮龍兮苦與螟螣厚餘毒稽首方社前訢帝
將龍逐好晴十日無片雲再荷蓑笠叱黃犢

遊晴田崗

李先春

州人
恩貢

歲大淵獻秋相月往尋古崗戴笠出披榛躡厓迤
邐上冠者五六童六七崗名題處蹊難通旁敞大

鶴峯州志

卷十三 藝文

六十

厂穿罅窺俛瞰來徑隔萬仞峭削眩目蹲虬龍未
入且先覓石碣碣不特棐依壁鏤撰記洋洋千餘
言風霜剝蝕半殘缺捫壁摹畫推縱橫畧云修崗
緣藏兵人情爲田民有奧康熙庚申九峯營振衣
同向崗中遊寒析毛髮風颼颼靈草異花歷落長
土壘石牀無可求谿訝谿問參錯開人持油炬并
楮煤蝙蝠飛驚蟾蜍突少年譁呼鬼物來耳畔忽
聞鞞鞞聲下有伏流穿崗行試投巨石響砰磕罅
隙微露天光青溜巖玲瓏懸亂窟搜牢敲擊競勃
勃賞勝故應還吾輩往時夢來殊荒忽袖雲崗口

行仍留禾黍高低原野秋蠻觸戰場底處是極目
日落古梁州

田九峯宣慰墓

龔傳瑜州人
歲貢

往代英雄多奇特破碎山河自成國豈知中原割
據時更有餘人鬪草澤夜郎自大膺專城蝸角蠻
觸皆簪纓田氏累葉雄容美九峯將軍尤錚錚將
軍制作藏內府舊事翻成新曲譜紅梅白鹿風雅
留惜哉再傳失疆土阡碣矗立溪橋邊苔封碣字
紛不全石馬縱橫臥榛莽松風蕭慘搖蒼烟陌上
過客行行止太息冢中人不起有兒高建歌舞樓

鶴峯州志

卷十三

藝文

六一

曾擬仲謀與亞子歌殘舞謝空悠悠深山杜宇春
歸愁欲訪遺跡故老盡溪聲日夜西向流

望鄉臺

部生樗州人
庠生

蜀山趨入彝陵止鶴峯山附蜀山尾勢如江流欲
出峽盤折奔騰逞奇詭就中望鄉臺最高巍巍峩
峩入青霄斗州廣袤八百里挺拔居然羣山豪此
山正當我門牖終日瞻眺卯至酉今來躡足峯頂
上始見羣山下界走林風颼颼振長空呼吸之間
通蒼穹極目天低鳥沒處中隔雲烟千萬重峭壁
老樹欹不折怪禽飛出虎豹穴暗泉淅瀝晴如雨

陰岩猶留太古雪我行至止方清晨我室人語猶
可聞獨立蒼茫百端集嗟爾東西南北人

辛未歲劉邑侯編審戶口作長句上之

部生榕

州人拔貢

柘溪歸流隸版籍坡陀延袤里八百編氓多從鼎
禮來依厂結茅此與宅是時老林初燒墾草木腐
化卽糞澤春日鋤翻烟雲叢包穀播處行歷歷蕉
實旁挺大逾把笋籜密封長盈尺叅如貫珠粒在
房熟驗垂綉白轉黑實堅炊飯飽充腸一夫耕足
八口食雞鳴狗吠山谷應往來行旅羨樂國數十

鶴峯州志

卷十三

藝文

六十二

年來雨潦洗磽确空餘鑿鑿石間有土山多不毛
和糞播種終嫌瘠流寓紛紛復他徙貧者難遷腕
徒搯可憐荒舍破釜中常雜蕨薇供朝夕可憐鶉
衣鵠面人常棄耒耜應徭役我聞民生勤不匱柘
谿勤亦生理窄力農旣苦壤無膏逐末偏值地太
僻頰肩負茶復荷鹽辛苦傭保濡餘瀝豐歲難贍
俯仰資若逢荒歉更逼仄召父杜母今何人殷勤
編審戶口册請問此州男女數較量盈絀何如昔
州堂槐樹四株閩中吳岷來夫子刺州時所
手植也十閱春秋大逾拱把對之有作

部生榕

殷勤樹木種踰淮留取甘棠覆滿階惆悵公門桃李老成陰不得比疎槐

州城建修 文昌廟予赴鄉勸捐頗形踴躍

喜而有作 部生榕

文治烝烝秩祀新釀金作廟遍鄉鄰故交驚看鬚眉改初識咨嗟姓字陳富肯破慳緣信我貧嘗徹骨未欺人衆擎計日經營就好潔蘋蘩共禮神

過奇峯關作呈部晴峯 劉紹純 廩州生人

峯巒犬牙錯一綫少坡陀土瘠穀頭短山空泉眼

鶴峯州志 卷十三 藝文 六三

多成無鳴柝警野習插秧歌好待新醪熟澆花處處過

重修 文廟落成恭賦八韻 部生椿 州生人

奕奕 先師廟何緣底再成告竣資代俎經始自專城工閱頻年集梁諏吉日迎飛薨依舊址澀浪蹙新閔以妥崇遺像於昭奠兩楹更增良牧位還待哲人生嘉樹吾翁植鳴絃闔邑賡儒林同釋奠竊喜廁羣英

山羊司 龔經德 州人 附貢

層山疊嶂擁周遭禾黍芄芄土壤膏佇盼雄關盤

百仞翻嗟閒署勝三刀當年蠻觸分蝸角此地熊
羆成虎牢 聖代人安耕鑿樂絃歌聲出暮烟高
重過韭菜壩

田玉疇

庠州生人

不見山家老圃勤重來春韭綠如芹朝經宿雨人
初剪晚值新炊客欲分虎跡縱橫穿嶺過鳥聲啁
晰隔溪聞荒榛一帶鳴鞭急無數鼯鼯亂撲雲

挖蕨

田士選

庠州生人

斲根搗粉濟年荒共說入山開土倉得飽不須天
雨粟積勞勝獲禹餘糧綱團絳雪千溪月杵發輕
雷萬谷霜只待新畚蕎麥熟農歌又聽遍巒岡

鶴峯州志

卷十三

藝文

六四

迴龍閣懷古

趙顯廷

慈利生員

芳林日落訪遺蹤畫閣臨橋瑞靄濃漢土當年曾
走馬谿山此日尙迴龍團圞十畝開金地平遠千
家入翠峯防隘營前空炬壘風清粟界夜聞鐘

江口卽景

于世超

庠州生人

崖迴路轉小橋低夾岸人烟古渡迷林抹數峰界
南北水流雙派會東西白榆山對紅花近青佛雲
連赤石齊明月洲前憑晚棹恍疑身在武陵溪

白榆

紅花青佛赤石明月洲皆附近地名

登州城望舊司祖塋宰木伐盡感書二絕

劉開泰
庠州生人

無復風烟助慘悽縱橫翁仲臥塗泥誤他杜宇春
來血盡日哀哀何處啼

量圍解帶往時情此日城頭望眼驚寄語故家佳
子弟須防抔土也耕平

上望界

劉紹寬
庠州生人

望去渾疑天可接到來真覺足離羣陰陽坡得日
光半乾濕路從山頂分巖積三冬新舊雪樹穿四
野往還雲一聲長嘯隨風起上界下方聞不聞

溪坪道上

龔紹崧
庠州生人

鶴峯州志

卷十三

藝文

六十五

細雨霏微欲釀泥霧籠馬首望中迷空山響荅丁
丁斧知有樵人在隔溪

辛未七月龍潭坪雨雹殺稻

田興邦
庠州生人

築塲庠錢待攢珠硬雨偏教數里無傾耳初聞催
羯鼓舉頭旋訝碎冰壺穗空成帚迎風埽種播如
春貼水鋪天物仍愁天暴殄謀生底事是良圖

咸盈河道上

宋大松
庠州生人

潦涸溪爲路羊腸曲曲圍猿循石梯下燕撲水簾
飛逕轉天臨窄崖高日到稀前山雞犬見好去款
雲扉

龍潭古鼎歌

拔貢 田福康 州人

青龍山脉寸雲起倏忽蜿蜒幾千里潛流滙作桃花潭風雨時噴老龍水但見波底雲鬱葱爭說寶鼎藏龍宮瓊樓貝闕在何許鱗甲照耀森玲瓏我聞黃帝迎日推策逢己酉冶金鑄鼎文從斗又聞神禹貢金九牧河光榮縷形列狀輸精誠龍潭之鼎鑄何年光芒閃爍千人傳披圖載考地輿志溱溪溶萬擘畫成山川如何龍頭豕腹有光怪不與高陵深谷同推遷自是化工鼓鑄多神力爐錘天地生雲烟及今精靈那可掩吐吞日月寒芒閃雷

鶴峯州志

卷十三

藝文

六十六

車殷殷推九霄一鞭獨掣金蛇高四圍靉黳如潑墨潭水返照雲欲裂鼎在虛無縹渺間不知赤山之銅荅山鐵又或蟾魄懸天中金波下與銀河通珍珠燦爛貫星宿百靈呵護蒸霞紅昌黎當日歌石鼓大筆淋漓洒飛雨彭蠡湖邊尋石鐘髯公逸興爭千古龍潭之水何其深香溝淼淼流清音噌吰鞳鞳石與金不爨不汲留寄崑古物應響東西潄聽我匣中雙劍如龍吟

水砦卽景

李定才□□□□

老圃寒花作意黃丹楓烏柏逗斜陽秋山不讓春
山好紅葉叢中蛺蝶忙

容陽雜咏和韻

李定南廩州生

深山累葉擁蜂衙俗不彫題面不花拋却前人金
紫貴忍伸螳臂抗 天家

蝸角紛紛已斂關如何輸款後諸蠻遺民太息東
東事從古貂璫總一般

寶善樓連寶善宮宮傾樓圯化秋風容陽舊蹟銷
磨盡惟有西流水不東

鶴峯州志

卷十三

藝文

六十七

風雲旌旆馬鳴嘶霜降公然出柘谿荆府羊裘虛
想望 皇輿直到夜郎西

脣齒相依理不誣可憑狡詐逞狂圖青麻索繫鄰
酋日爭料巖封注已孤

鑿窟謀成喜萬全坐街苦把崗民傳顛當不遇蠚
螭寇亦有豺梟颺烈烟

無復當時著作樓名登四庫簡編留九峯應抱千
年恨不道生兒擬仲謀

子夜聞聲喚奈何桃花扇惹客愁多只今菊部長
消歇留得端公下里歌

橋頭墓碣頗生暉紫誥褒嘉世閎巍宰樹春深啼
杜宇聲聲猶道不如歸

澗泉雲壑自清音往事悠悠歲月深琴閣艷傳新
樂府馬鈴爭似雨淋淋

脚踏坪道上暑行

羅玉麟

庠州生人

去郭二十里無風自在涼馬頭出林外時有野花
香

秋晚水沙坪道上

龔紹杰

庠州生人

泉聲瀲灩飛山色蒼蒼接秋樹驚鴉起蕭蕭下黃
葉

鶴峯州志

卷十三

藝文

六十八

石龍洞早行

徐承禮

庠州生人

曉霧迷離曙色微露珠顆顆洒征衣橋頭立馬塵
心淨石上流泉學雨飛

神壇坪巖流細若檐溜每日寅午戌三時大
如傾盆逾時復細晴雨皆然人呼爲三潮

水

周光勳

庠州生人

巉巖多是碧流懸幻出靈奇獨此泉涓滴頻驚飛
匹練海潮不信到山巔應時消長眞堪異隨月盈
虧却未然一勺也教難蠡測惟餘三疊聽潺湲

紫雲宮

洪先彝

庠州生人

紫峯矗立望亭亭仄徑蛇盤入杳冥杖底雲連平
野白門前樹界半天青斷橋歲久鐵如繡陰洞夜
深螢似星太息尙酋遺蹟邈惟餘鐘磬苔山靈

印山石

田純德
庠州生人

鶴峯山裹山山多峭石誰削方以平纍纍山以
擲奇哉此石鈕盈丈自天割如匣函綠紋啓則燿
金赤秦漢有印統王侯異品格梁代忠孝侯金印
石胎擘大造生偉人精英竅山澤茲石真石材天
肯爲剗颯轟雷攫其礧疾風刷其塋篆成天雨粟
堅光發地脉莎廳亘於前握之擁檠戟山靈叶休

鶴峯州志

卷十三

藝文

六十九

徵勝蹟留竹帛

登鶴亭

龔紹嶠
庠州生人

鶴亭留勝蹟登眺藉餘閒繞郭都成障憑欄飽看
山遙青昏雨脚濃翠溼煙鬟刺史風流杳芳蹤不
可攀

登平山

龔紹融
庠州生人

高壓香爐勢倒懸眞如螺黛白雲邊危峯傑立疑
無地峭壁橫開別有天萬疊附庸晴後見四時眞
面雨餘傳土人猶說當年事指點城濠盡宿烟
郡城聞部晴峯采輯邑乘寄詩奉問

洪先緒

平生懶不學嵇康驛使來逢問必詳
共道說詩匡鼎樂更聞握槩子雲忙
如椽筆掇山川秀附驥人欣姓字香
草創遙知思急就少微星色漸成黃

課徒暇采輯邑乘洪理堂自郡城以詩寄問
次韻荅之
部生榕

清時無處不平康風土先從里閭詳
載筆難憑愛斯錄臨文仍恐錯因忙
肯教泉下人多恨爭得山中草亦香
搔首茅檐佇君至西窗細與共丹黃
按自來修邑乘者列藝文一門祇載某人著某書

鶴峯州志

卷十三

藝文

七十

凡若干卷經史子集皆以類編固未暇盡錄其詩
文者而不可以此例鶴邑也鶴邑僻處一隅代無
聞人惟田元頗事詩書有金潭吟意筆草田舜年
多勞績而能文章所著廿一史纂容陽世述錄亦
可謂鐵中錚錚矣下此則唐世英以能詩名而他
無聞焉欲求如經史子集之以類編不誠戛戛乎
其難哉操觚者於此廣蒐博採以歸一爐而成五
鯖亦良苦矣乃世猶謂其求益選肥則何也